

Mukaana kundaa Filemõ OSOMO

Wu mukaana wu ósono Poole kundaa ndughu a nde Filemõ. Baghala munde áli musí Kolose, ya nde áli mbwuru wu munene mu bvulu lí bo. Nde bu ágyughu Poole mu okaluo Nsia Yí Mbwe, ñaana oño nde ási kana ya ágwi bumweẽ bu nde kundaa Kriste. Ña kara lí bankana ba nde olí a mbwuru nkwumu Onesime. Nde bu ábulubara kundaa mfumu a nde, ámono Poole wu áali mu boloko. Poole áluo nde Nsia Yí Mbwe, yí a Mfumu Yíisu-Kriste, ya nde sí ánama nzilí oyo.

Poole ásono mukaana wu kundaa Filemõ, mu olyele nde asa Onesime kolokolo. Me Onesime ndeme àabirí mukaana me. Mu mikyene mimi matala mamo, Filemõ áli akughu osa Onesime nkana a nde bu adzyi nde, bwunu we odzwa nde. Mu mukaana wu, Poole ábuono nde mpaala anyaa ogwolo Onesime tí anga nkana wu áabara. Lo nde ályele nde agyagha nde bubwe, mu kuulu, mu matala ma, bo balí emõ mu Yíisu-Kriste.

Bu me bu bakakaba mukaana wu:

- Mamboro (1-3).
- Poole bvurulu matuono kundaa Nzaami mu nkooro a Filemõ (4-7).
- Poole buono Filemõ mu nkooro a Onesime (8-22).
- Mamboro mama masini (23-25).

Mamboro

¹ Me Poole wu ndi mu boloko mu nkooro a Yiisu-Kriste, ya Timote ndughu a me mu kana, lisono mukaana wu kundaa we Filemõ, ndughu a bihi wu a dzyi mu esala.

² Bihi ligweghe si mukaana wu kundaa nkele a bihi Apya, kundaa Aresyipe ndughu a bihi wu mamvulu, ya kundaa libwunu li Nzaami li lili mu nzo a we.

³ Nyaã bwehe ya edzuunu bi bifi kundaa Nzaami Taara a bihi ya kundaa Mfumu Yiisu-Kriste bikala ya be!

Dzyi ya kana bi Filemõ

⁴ Matala mwohono ma aakansamana me mu we, me aakambvurulu matuono kundaa Nzaami a me,

⁵ mu kuulu me ndi mu okagyughu bu bali mu okabili mu dzyi li li a we mu baana ba Nzaami bwohono ya mu kana li we mu Mfumu Yiisu.

⁶ Me aakansamana Nzaami ti kana lili a we emõ ya bihi likala a mpini, mpaala we gyighili obaghala mandagha ma mabwe ma lili a mo mu Kriste.

⁷ Ndughu a me mu kana, dzyi li li a we liigwi me esee ya bukyini, mu kuulu mu we mikolo mi baana ba Nzaami miibagha edzuunu.

Filemõ faana obwana a Onesime

⁸ Me mu obo, ngu okala ti mu Kriste me ndi bunya-nyaã mu otumu we ndagha yifaana ogyighili,

⁹ lo me nduomo we ndagha mõ mu nkwumu a dzyi li bihi a we, me Poole, enjmini ya mbwuru a boloko si mu matala ma mu nkooro a Yiisu-Kriste.

¹⁰ Me mbuono we mu obwana a Onesime, mwana a me mu matala ma ndi me mu boloko.

¹¹ Mu matala ma maaluru, nde ka ákakala a mupfunu kundaa we o, lo mu matala ma nde li a mupfunu kundaa we ya kundaa me.

¹² Me mbvurulu nde kundaa we, nde wu li ti anga mukolo a me.

¹³ Me áakandzyi ti nde asyili ña bele a me, mpaala nde asalala me ña ebini e we mu matala mwohonono ma aankala me mu boloko mu nkooro a Nsia yi Mbwe.

¹⁴ Lo me ka ndzyi ogyighili ndagha si mõi o kala ti we ka gwi me muswa o, mpaala ndagha yi mbwe yi aasa we mu me yinyaã okala yi ti anga yi okwighi, lo yo yikala yi aasa we mu dzyi li weme.

¹⁵ Mu kuulu, okughu okala ti Onesime mu mana matala ákaghaba ya we, mpaala we firikala ya nde mu matala mwohonono.

¹⁶ Mu kuulu mu matala ma, nde ka aafirisyili yini a nkana o, lo nde bvulu nkana mu mupfunu, ti anga ndughu mu kana wu a dzyi. Me ndzyi nde ku olagha, ya we sa bvuludzzyi nde ku olagha mu kuulu nde li mbwuru ya ndughu mu kana mu Mfumu.

¹⁷ Mu obo, kala we aakamono ti me ndi ndughu a we, bwana a nde ti anga me we li mu okabwana a nde.

¹⁸ Kala ti nde aasi we ndagha yimbi, ya kala ti nde li a ebyimi e we, twulu kye mu nkwumu a me.

¹⁹ Me Poole nsono ndagha yi mu kwogho e meme: Meme sa mfiri ebyimi e we. Me ka ndi a nzala a olyele o ti wehe si li a ebyimi e me, ebyimi ekye me bumweẽ bu weme.

²⁰ Eẽ, ndughu a me mu kana, gyighili me ndagha oyo mu nkooro a Mfumu, sa kuulu ti mukolo a me akala kunsu edzuunu mu Kriste.

Mamboro mama masini

²¹ Me nsono we mukaana wu mu kuulu me ndi a emiini mu bintamana bi we, bu nsolo ti we sa gyighili mandagha ma maluru ya ma aantumu me we.

²² Me firinduomo we mu ogyighili me ebini kii ogyonomo, mu kuulu me ndi a emiini ti Nzaami sa agwa mvuru mu nsamana a be, ya nde sa abvurulu me kundaa be.

²³ Epafarase, ndughu a me wu a boloko mu nkooro a Yiisu-Kriste, gwi we mboro.

²⁴ Bandughu ba me baba esala: Mareke, Arisitareke, Demase ya Luk bagwi we mamboro.

²⁵ Nyaã bwehe bu Mfumu a bihi Yiisu-Kriste bukala ya be!

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d